

**ACTA DERA SESSION EXTRAORDINÀRIA
DETH PLEN DETH CONSELH DE DATA 1 DE HEREUÈR DE 2007**

Assistissen:

Sindic d'Aran,

Mgfc. Sr. Carlos Barrera Sánchez.

Conselhèrs,

Mgfc. Sr. Francesc Medan Juanmartí,

Mgfc. Sr. Francesc Vidal Vergés,

Mgfc. Sra. Mercedes Delaurens Deó,

Mgfc. Sr. Arturo Sánchez Farré,

Mgfc. Sr. Francés Boya Alòs,

Mgfc. Sr. Rufino Martínez Cau,

Mgfc. Sr. Antonio Asensio Pujol,

Mgfc. Sr. Hipólito Cruces Socasau,

Mgfc. Sr. Manel Rocher González e,

Mgfc. Sr. Emili Sanllehy Meya.

Secretària,

Sra. Anna Llinàs Rovira.

En Arròs, a un de hereuèr de dus mil sèt, en tot èster es dotze ores e quinze minuts, s'amassen ena sala de sessions dera Casa deth Senhor d'Arròs, abilitada ar efècte coma Sala de Plens, es membres nomentadi en marge, en tot desencusar-se d'assistir-i es conselhèrs Mgfc. Sr. Víctor Leon Plana e Mgfc. Sr. Joan Estévez Sans.

Er objècte dera reünion ei celebrar Session Extraordinària deth Plen deth Conselh Generau d'Aran en prumèra convocatòria e, un viatge comprovat pera secretària era existència de quòrum de besonh entà que pogue començar, ac comuniquè ath sindic que la declare dubèrta e publica e se procedís a balhar compde des següents punt der Orde deth dia:

1èr.- CREAR UA COMISSION QU'INCORPÒRE REPRESENTANTS DES SECTORS AFECTADI ENTÀ AVALORAR ERA ARTENHUDA DES PÈRTES DETH SECTOR E ES POSSIBLES AJUDES.-

Eth sindic manifèste qu'en tot atier era peticion per escrit qu'entrèc en Conselh Generau des Magnifics conselhèrs deth PSC-Unitat d'Aran e deth PRAG entà amiar a tèrme era celebracion d'un Plen Extraordinari tà debàter sus dus punts fòrça concrèts, damb aquest motiu s'a convocat eth Plen Extraordinari deth dia d'aué.

Pren era paraula eth conselhèr Mgfc. Sr. Francés Boya Alòs entà arregrair ath sindic era acuelhuda d'aquesta iniciativa que çò que pretén ei poder daurir un debat sus un ahèr tan important tath país d'Aran. Auer un iuèrn coma eth que s'està auent, ei a díder, d'un biais era manca de nhèu e der aute, es consequéncias qu'aquerò supause tath sector donques a daurit, non ua crisi -pr'amor qu'aquesta paraula dilhèu non s'ajuste exactament a çò que s'està viuient en aquest moment-, mès òc ua situacion dificila tà determinadi sectors e, evidentament, tàs personas que son trabalhant dirèctament ena nhèu. Ath delà, aquerò non solet afècte ara estacion d'esquí senon que tanben afècte a molta gent que i trabalhe, siguen monitors d'esquí o sigue senzilhament gent que vie en prevision de trabalhar ena

ostaleria e non ac a pogut hèr, afècte a petiti empresaris e en generau, afècte ath país pr'amor que s'a d'auer en compde qu'era economia aranesa se fomenta en torisme e sustot en torisme d'iuèrn. Per tant, dauant d'ua situacion coma aguesta, qu'era maxima autoritat der Aran non l'abordèsse, que non se hèsse un debat e que non i auesse un reflèxe ena opinion publica aranesa de qu'entàs conselhèrs aciu representadi se tracte d'ua qüestion prioritària e preocupanta, donques ara aumens se poirà veir que s'a sajat de hèr aquerò que cau hèr en ua ocasion coma aguesta.

Atau, era prepausa ei fòrça concrèta pr'amor que pense qu'era actuacion deth Conselh Generau d'Aran a d'estar fonamentada basicament en dialogar, en parlar damb eth sector. En aguest moment, dilhèu ei lèu tà hèr ua avaloracion de çò que serà o de çò que pòt èster eth finau d'aguesta temporada mès calerie establir un organ que pòt èster ua Comission paritària entre es politics e eth sector privat damb representants des diferents agents que son en aguesti moments en món deth torisme, sigue pera via pròpiament otelèra o pera via dera pròpria estacion d'esquí; en fin, se tracte d'assumir eth debat e qu'aguesta Comission pogue hèr ua avaloracion en ua prumèra instància dera temporada. Mès çò qu'a de preocupar non ei tant -e insistís-, eth resultat d'aguesta temporada senon es problèmas estructuraus qu'a eth modèl toristic aranés que son fonamentauments era manca de diversificacion e eth besonh de sajar d'incentivar era rèsta de sasons der an tà non depèner tant estrictament dera climatologia e, per tant, aciu i a un camp de trabalh fòrça important.

Continue manifestant eth conselhèr Boya qu'en aguesta legislatura, eth sòn grop politic a hèt aportacions que poderien èster considerades. En sòn moment, se considerèc que non èren oportunes, mès dilhèu ara ei un bon moment tà reconsiderar-les e en tot cas, daurir un debat que pense a d'èster en aguest Plen mès sustot en aguesta Comission tà poder vèir quines son es mielhors estratègies tà qu'eth país sigue mielhor plaçat. Atau, ua serie, tà qu'en cas de situacions coma aguesta se pogue respóner d'ua manèra més eficaça e ua auta, sajar de hèr mès competitiu eth sector aranés e abordar damb mès eficàcia era diversificacion dera que se n'a parlat molt, mès que dilhèu encara non s'a arrenhut ne de bon tròç: ara per ara, i a un camp de trabalh que se sap que serà long, mès qu'en tot cas cau acertar es mielhors estratègies possibles.

Per tant, aguesta ei era prepausa e era percepcion deth sòn grop de coma se pòt abordar era situacion en aguest moment, en tot sosméter-la ara votacion deth Plen s'atau ac considèra oportun, e en cas afirmatiu méter-se en contacte damb eth sector e sajar de formar aguesta Comission e de hèr un debat permanent sus es problèmas estructuraus deth torisme en Aran.

Pren era paraula eth sindic entà manifestar qu'ei evident qu'era climatologia e eth retard ena arribada dera nhèu non sonque a afectat ara estacion d'esquí de Baquèira senon a tot Aran e a totes es estacions d'esquí, aumens es de Catalunya. Atau, a part de bères declaracions de membres deth govèrn dera Generalitat de

Catalunya, non hè gaire i auec ua amassada dera Federacion deth Grèmi d'Ostaleria en Tresp a on s'arribèren a ues conclusions e/o auteratives que quan les liéges (coma eth ràfting, escotar audèths o hèr senderisme, tot açò en iuèrn) donques d'acòrd..., mès pense qu'ara non ei eth moment de hèr ua exposicion detalhada de tot çò que s'a hèt a nivèu de Conselh ne de toti es mecanismes des que dispause Aran autant a nivèu de promocion e aufèrtes toristiques coma de comèrç. Pense que çò melhor serie hèr ua edicion de çò qu'a e dispause Aran coma aufèrta toristica, en tot dar un coneishement exhaustiu, concrèt e clar ath sector empresariu, autant dera ostaleria coma dera restauracion, e coma deth comèrç.

Per çò que tanh ara prepausa de crear ua Comission, pense qu'aguestes Comissions son interessantes mès que tanben, crear ues expectatives que non siguen contemplades dempús peth govèrn autonomic entà que siguen d'aplicacion en tot eth sector de destinacion toristica d'iuèrn, pòt èster fòrça complicat pr'amor que quinsevolha intencion de hèr ua avaloracion des possibles pèrtes e des ajudes economiques de besonh se non van tostemp recolzades per ua opcion deth govèrn autonomic, des dera pròpria administracion territorialu aranesa ei dificil poder dar ua respòsta d'aguestes avaloracions, quèstion qu'ei parièrament aplicabla a tot eth Pirenèu catalan.

Le semble fòrça ben crear aguesta Comission mès era sua opinion ei molt concrèta en aquest ahèr, pr'amor que dempús d'auer agut diuèrses amassades damb eth Grèmi d'Ostaleria e damb d'alti sectors fòrça implicadi coma era pròpria estacion d'esquí de Baquèira, pense qu'ei molt important qu'era iniciativa, qu'eth gruish dera responsabilitat d'aguesta Comission, a de requèir mès en sector privat qu'ena pròpria administracion. Cre qu'a d'èster eth sector privat eth qu'analize era sua situacion, tota era sua programacion d'aufèrta autant otelèra coma de restauracion, de tot çò que s'està hènt. Evidentament, des dera administracion tanben s'a de hèr aguesta analisi e se convie hèr ua auditoria de totes es possibilitats qu'a eth país entà veir se dejà i son contemplades o se i a agut eth descuet de bèth diamant qu'encara non s'a sabut veir e que calerie explotar e dar-lo a conèisher. Mès sustot, aguesta auditoria a de servir entà analizar tot çò que s'a hèt e se hè des deth govèrn: çò que s'a en ambit comerciau, quines iniciatives e quines activitats se pòden hèr en ambit der entorn naturau, eca. Per tant, ei completament d'acòrd ena formacion d'aguesta Comission, mès damb era prepausa de que sigue ua Comission fòrça mès cargada des pròpris sectors empresariaus que non des personas damb responsabilitat politica e que formen part des grops politics que constituissen eth Conselh Generau d'Aran, donques reauments a d'èster eth sector qu'a de poder agarrar e analizar en progonditat quines son es mesures damb es quaus i seràn completament d'acòrd e de coma les afectarà enes sues programacions toristiques futures.

Pren era paraula eth conselhèr Mgfc. Sr. Francés Boya Alòs entà manifestar qu'ei practicament d'acòrd en plantejament que hè eth sindic d'aguesta qüestion, que non se tracte d'establir un pes politic senon d'auer toti un posicionament clar. Mès cau díder que se tracte d'un tèma qu'afècte as pèrtes économiques e aquestes son relatives pr'amor qu'era situacion a estat fòrça variabla en ample deth Pirenèu e era nhèu artificialiu, a diferéncia de çò que passèc enes ans 89/90, a jugat un papèr determinant. Alavetz, se da era coincidéncia qu'estacions damb ua capacitat innivadora nauta an trabalhat practicament çò de madeish qu'era passada temporada mentre qu'aciu, coma eth percentatge innivador ei deth torn d'un 30% o 40%, era aucupacion tanben a agut un percentatge semblant. Pense qu'açò non ei un debat alien ad aquesta qüestion pr'amor qu'era innivacion artificialiu ei absolutament de besonh e se li a de dar supòrt, e per tant cau veir quins son es recorsi idrics des quaus se dispause entà poder-los profitar d'una manèra racionau, e tostemp laguens deth marc legau. D'aute biais, ditz que tanben ei vertat que plantejar resarcir as negòcis plantège eth problèma que laguens deth pròpri sector dera ostaleria non ei çò de madeish eth sector dera restauracion que d'auti ambits. Per tant, eth sòn grop politic ei d'acòrd en aquest sentit e era Comission s'a de centrar mès enes problèmas estructuraus que non pas enes conjunturaus d'aguesta sason.

Per çò que tanh ar eish centrau d'aguesta Comission ei clar qu'eth sector toristic aurie d'èster totauments representat enes diferents sectors e dilhèu se poderie hèr un primèr intent de hèr ua trobada damb eth sector a veir qu'ei çò que pensen e a partir d'aciu, prepausar de formar era Comission damb, per exemple, tres o quate conselhèrs deth Conselh, es tecnicos deth Conselh qu'eth govèrn considèrè que i an d'èster e finauments, es representants deth sector, entà poder començar a abordar damb un programa de trabalh molt concrèt sus es qüestions que s'an de plantejar en aquesta Comission. Per tant, prepausar modificar era prepausa d'acòrd en aquest sentit.

Pren era paraula eth conselhèr Mgfc. Sr. Emili Sanllehy Meya entà manifestar que basicament i ei d'acòrd e qu'era avaloracion de pèrtes s'a de hèr, mès non se tracte autant dera possibilitat d'ajudes -e, en sòn cas, eth sector dejà harà es demanes que corresponguen- senon coma era importància que a era formacion dera Comission. Ei d'acòrd damb eth sindic qu'eth producte i ei e açò mèrque, e que possiblament era gent ei informada, mès çò que passe, sustot en Nadau, ei qu'era gent vò anar a esquiar e non se preocupe d'arren mès dera aufèrta toristica dera Val d'Aran pr'amor qu'era sua principau prioritat, senon era unica, ei anar a esquiar. En moment qu'aguesta gent non ac pòt hèr o ac pòt hèr mau, eth conselhèr Sanllehy cre que s'aurie agut de potenciar fòrça mès era informacion des autes possibilitats e çò qu'a mancat a estat ua estratègia que hèsse qu'immediatament qu'es clients se trapen defraudats enes sues expectatives ena Val d'Aran, sajar de cercar es mielhors gessudes possibles entàs sues satisfaccions, en tot informar-los fòrça mielhor e fòrça mès rapidament d'aquestes autes possibilitats e productes existents qu'eri non s'an preocupat de cercar pr'amor que non vien entad açò, senon entà anar a esquiar.

Per tant, pense que laguens d'aguesta Comission s'aurie de sajar d'avalorar auer ua sòrta de plan d'emergéncias pr'amor qu'en moment que torne a passar açò, s'aguèsse dejà eth protocòl informatiu que permetèsse ajudar as clients a trapar-se mès a gust, ei a díder, que des des organismes de promocion deth torisme açò pogue arribar. Non ei qu'era culpa sigue tota deth sector d'aciu, dat qu'es informacions i son e s'era gent se'n preocupèsse segurament ac arribarie a conéisher, mès eth client non ac harà perquè ven entà ua auta causa. Coma sigue, s'a de hèr arribar aguesta informacion e tot çò qu'eth país pòt auferir e qu'evidentament ei molt mès. Dilhèu, per exemple, les cau explicar quini son es sendèrs practicables en aguesta epoca. Per tant, en cèrta manèra e se se permet era comparacion, serie auer un protocòl d'emergéncias parièr ath des pompièrs: quan passe ua causa, as pompièrs non les i cau pensar coma ac an de hèr perquè dejà ac saben. Donques aciu, en tot hèr un simil, se tractarie d'auer un protocòl en qué Torisme Val d'Aran digue qu'eth sector a açò, que se pòt hèr açò e qu'eth sector harà çò d'aute e hèr'c convergir tot en un unic punt entà poder dar un mielhor servici.

Finauments, eth conselhèr Sanllehy manifèste que tanben ei d'acòrd qu'en aguesta Comission eth sector privat a d'èster mès e mielhor representat que non es politics.

Pren era paraula eth sindic entà manifestar que sonque vò dar ua respòsta molt brèu as paraules anteriores, en tot lamentar-se qu'aué non i poguen èster n'eth Mgfc. conselhèr de Torisme Sr. Víctor León n'eth Sr. Manolo Español, director de Torisme Val d'Aran pr'amor que son en Madrid ena Hèira Internacionau de Torisme, donques cau díder que, quan se preveiguec coma serien es previsionis de nhèu entad aguesta sason, des de Torisme Val d'Aran s'amiec endauant un huelheton que ditz "Qué hacer además de esquiar". En tot cas, mès, es persones que formen part d'aguesta Comission s'an de cargar de responsabilitat e creir que dera Comission, mès enlà d'elaborar un informe, an de gèsser compromisi deth sector pr'amor qu'era informacion non a d'èster responsabilitat sonque des oficinas de Torisme Val d'Aran, senon qu'a de començar perquè eth pròpri empresari age ena recepcion ua persona formada... A partir d'aciu, s'a de començar a plaçar era responsabilitat en punt a on reaments s'inicie eth problèma perquè i a empresaris qu'incorpòren eth sòn personau eth mateish dia d'inici dera temporada e per tant, ad aguesta persona de recepcion pòca causa mès se le pòt demanar qu'eth foncionament der otèl, e aciu comence un prumèr esfòrç entà tot er ambit. Ei evident qu'es pompièrs saben quini son es sòns protocòls d'emergéncias pr'amor qu'es pompièrs son es madeishi e an ua estructura a on i a un reciclatge permanent, causa qu'en sector otelèr non passe. Per tant, demore qu'en aguesta Comission i age toti es agents que s'i agen d'implicar e que s'a d'entèner damb tota claredat quina ei era sua finalitat e era sua foncion, que non a d'èster sonque de derivar responsabilitats donques, coma dejà s'a dit, es responsabilitats an de començar pes pròpris ambits e sectors representadi. S'era Comission comence a caminar damb aguesta mentalitat, cre que valerà era pena e

que reaments ne poirà gesser finauments un bon resultat entà tot eth país e dilhèu, d'aguesta manèra, era situacion serà mès facila entath govèrn perquè per un viatge, non sonque totes es obligacions seràn dera administracion, senon que començaràn peth pròpri sector, en tot assumir era administracion coma molt bèra responsabilitat de dar acompanhament ad aqueres obligacions e que dejà estarie ben que, per un viatge, es causes se metèssen en sòn just tèrme, ei a díder, qu'er empresari assumisque qu'a ues obligacions e qu'era administracion l'ajudarà entà que pogue complir aquestes obligacions.

Pren era paraula eth conselhèr Mgfc. Sr. Emili Sanllehy Meya entà manifestar que se ben açò ei absolutament corrècte, tanben ei cèrt qu'es empresaris tanpòc an es esturments de besonh entà poder dar era formacion corrècta as sues plantilhes, ara quau causa eth sindic respon que des de Torisme Val d'Aran s'an organizat diuèrsi còrsi de formacion e que i a tot un materiau de promocion qu'ei a disposicion der empresari d'ua forma gratuïta e que simplement se tracte dera molèstia d'anar a Torisme Val d'Aran e agarrar era informacion que se considèra de mès interès e portar-la ath sòn otèl.

Pren era paraula eth conselhèr Mgfc. Sr. Emili Sanllehy Meya en tot demanar perdon pera interrupcion mès eth sindic l'a interromput abantes d'acabar, e en tot manifestar er sua sorpresa pr'amor qu'eth non n'auie n'eth mès minim coneishement d'açò qu'acabe d'expausar eth sindic, se ben non vò díder que non i sigue, mès que evidentament i a ua totau descoordinacion.

Eth sindic respon que dilhèu çò que passe ei que i a ua manca totau d'interès per part deth sector privat o d'ua part deth sector privat, perquè hè molti ans que foncione Torisme Val d'Aran.

Pren era paraula eth conselhèr Mgfc. Sr. Emili Sanllehy Meya entà manifestar qu'es informacions des oficines de torisme son insufisentes e que prumèr s'aurie de formar ad aquest personau entà dempús poder formar as auti, donques a viatges es causes que s'expliquen ara gent des des oficines de torisme ei fòrça deplorable se ben ditz que non vò díder que sigue tostemps, senon que i a caí... Mès considèra qu'ara non ei eth moment de tirar-se mès pèires de qui a mès o mens culpa perquè ath finau açò a de servir entà coordinar ath sector privat que tanben ei important, en tot alegrar-se de qu'aquest se volgue coordinar perquè açò ei çò que vò.

Respon eth sindic que jamès a estat era intencion deth Conselh coordinar eth sector privat donques era funcion de Torisme Val d'Aran e era conselhèria de Torisme deth Conselh Generau d'Aran ei méter ar abast deth sector privat toti aqueri productes que le pòden ajudar a èster competitiv en sòn ambit. Ua auta causa ei qu'eth sector privat age aquera volentat d'implicacion en un tant per cent que sonque sap cada empresari a títol individuau e que, des d'aciu, non se pòt saber. Per tant, eth sector privat a era sua responsabilitat e l'a d'exercir e s'a d'implicar.

Per çò que tanh a çò qu'acabe de díder eth conselhèr Sanllehy respècte ath nivèu de preparacion des personas de Torisme Val d'Aran, aguest ei un ens d'informacion e de promocion que passe toti es contròtles de qualitat e que lamente molt qu'era opinion deth Mgfc. conselhèr sus era preparacion des personas e des professionaus que trabalhen en Torisme Val d'Aran sigue aguesta, sonque perquè era informacion que s'age pogut dar a ua persona per ves a saber qui, sigue paraula de Diu. Ei per açò que le semble qu'aguestes declaracions son un shinhau fòrtes e lamente nauament qu'eth director de Torisme Val d'Aran non sigue aué aciu perquè supause que s'aurie pujat pes parets e qu'aurie dat arguments mès que sufisents e cargats de vertat e de rason entà rebàter aguestes paraules.

Pren era paraula eth conselhèr Mgfc. Sr. Hipólito Cruces Socasau entà manifestar que volerie hèr referéncia ara publicacion qu'a hèt Torisme Val d'Aran e que s'a qualificat coma huelheton, se mès ben le qualificarie coma un trist huelheton, "ua postaleta", perquè mès aviat semble ua gessuda rapida a un problema molt gros per non auer un plan de chòc coma plantejaue eth Mgfc. conselhèr deth PRAG. Ditz qu'eth sindic abantes a definit era grana riquesa que s'a en aguest país entà auferir as visitants, mès s'aguesti liegen açò s'emportaràn ua trista imatge de çò que i a en país pr'amor que practicament non i a arren donques ei ua postaleta ena que se definís un paisatge per bèri lòcs deth país, ua excursion ath començament quan se'n pòden hèr 50.000 d'excursions... Cre qu'açò aurie d'èster ua publicacion ena quau i aguesse un recuelh de totes es activitats que se pòden hèr en Aran e qu'es activitats aurién d'èster classificades segontes es grups, e en aguest trist huelheton se hè ua analisi de quate causetes coma se s'estiguèssen explicant per telefòn a un vesin d'ua auta comarca. Per tant, aciu se ve ua dicotomia entre era campanha qu'eth Conselh a endegat d' "*Aran, un país*" damb era definicion de país que hè aguest huelheton, en tot parlar dera Val en majuscules que semble qu'atau dejà ei ua grana paraula. E alavetz, se confón era Val d'Aran damb era Val de Toran que dejà le semble mès grèu... pera quau causa le semble qu'eth sindic non aurie d'èster gaire orgulhós d'aguest huelheton.

D'aute biais, pense qu'era Val d'Aran, en èster en centre deth Pirenèu, entre dus estats e un tresau fòrça aprèp, se poderie explicar que i a moltes activitats que se pòden hèr sonque a vint minuts o a ua ora. Atau, per exemple, se se parle de balnearis, non s'aurie de conformar en aguest moment, sonque parlar deth balnearis de Les e de Tredòs pr'amor que non dan solets guaires perspectives senon que tanben se poderie parlar, per exemple, deth balneari de Luchon, en tot profiter aguest entorn de proximitat que s'a. Per tant, non se tracte sonque de véner çò que s'a aciu senon de véner tot çò que s'a en entorn dejà qu'açò darà fòrça mès riquesa e sustot, se darà fòrça mès riquesa as visitants dera Val d'Aran. Ditz qu'ei vertat pr'amor qu'ac a vist en sòn negòci, qu'aguesti dies i auie gent que non sabie qué hèr e per açò, cau veir entà cada tipe de client quin tipe

d'activitat se le pòt auferir entà que le motive e reauments se volgue quedar ena Val, donques coma s'a dit abantes qui ven a esquiar sonque vò açò e còste auferir-le ua auta causa e dilhèu òc que cau auferir bèra causa mès que, entath sòn nivèu, le poge satis.hèr.

Pren era paraula eth sindic entà manifestar que lamente non compartir arren de çò qu'eth conselhèr Cruces acabe de díder e que pense que se n'a anat dirèctament ath següent punt deth Plen d'aué. Per tant, prepausa de passar ara votacion deth primèr punt, de crear aguesta Comission a non èster que i age bèra intervencion mès.

Pren era paraula eth conselhèr Mgfc. Sr. Manel Rocher González entà manifestar qu'era convocatòria deth Plen d'aué a a veir damb era manca de respòsta per part deth govèrn d'Aran dauant dera situacion que s'a plantejat aguest iuèrn.

Eth sindic -en tot lamentar era interrupcion- ditz que li hè er efècte que pògui des conselhèrs qu'aué intervien an era claredat e eth pròpri convenciment des accions e possibilitats des quaus dispause era Val d'Aran donques non an agut enes sues mans tot eth sòn materiau de promocion.

Pren era paraula eth conselhèr Mgfc. Sr. Manel Rocher González entà manifestar qu'eth sindic se confon pr'amor que çò que i a sus era taula ei ua situacion extraordinària des deth punt de vista laborau e empresariu, ara quau causa eth sindic respon qu'ei pleament conscient d'aguesta realitat.

Mès eth conselhèr Rocher manifèste que qui a agut de hèr eth pas qu'açò se debate en un Plen deth Conselh Generau a estat era oposicion e que per açò, aué s'ei aciu. Atau, dauant aguesta problematica, es huelhetons e es actuacions deth Conselh Generau anteriorament descrites, pòc an a veir perquè çò que i a ei un problèma economic qu'afècte a tota era Val d'Aran e, simplament, vò circonscriuer er objectiu deth Plen donques cau díder que i a un sector que per çò que semble, eth govèrn d'Aran obvie...[Eth conselhèr Rocher manifèste era sua indignacion dauant es gesti deth sindic quan encara non a acabat de parlar]

Ditz eth conselhèr Rocher qu'eth sector qu'eth govèrn d'Aran obvie ei eth sector laborau e se ben ei cèrt qu'eth sector privat a d'èster laguens d'aguesta Comission, cau rebrembar a totes es persones que son sense trabalh en ues situacions precàries en tot gastar-se totes es sues inversions en loguèr d'apartaments. Aguesta gent desbremhada ei era que mò es empreses dera Val d'Aran pr'amor que, sense personau, es negòcis serien barradi e dilhèu, aguest personau ei eth primèr que patís era crisi e eth sindic non les a nomentat en absolut. Per aguesta rason, se demane s'aguest personau que mò es otèls e es empreses dera Val d'Aran existís entar equip de govèrn.

Respon eth sindic qu'èvidentament qu'aguest personau existís, en tot demanar-se quina ei era pretension deth conselhèr Rocher damb aguest discors, donques ei clar entà toti qu'ua empresa sense colaboradors o sense treballadors non foncióne. Per açó, vò demanar-li ath conselhèr Rocher se a hèt bèra causa entà esclarir o desmentir es declaracions e es investigacions qu'era Conselhèria de Mieï Ambient ditz qu'a daurit per se Baquèira ei hè un mau usatge der estanh deth Clòt der Os entà hèr innivicion des pistes, ara quau causa eth conselhèr Mgfc. Sr. Manel Rocher González respon que d'aguest ahèrs se n'a de parlar dempús pr'amor qu'era causa que l'interèsse en aguesti moments ei eth personau.

Pren era paraula eth sindic entà manifestar qu'eth personau tanben patís era crisi que patís er empresari qu'ei qui a era empresa e qu'èvidentament, ei qui dispause d'aguest personau entà qu'era empresa foncióne. Per tant, respècte ath personau, pòca causa se le pòt díder pr'amor que çò qu'a de hèr eth govèrn d'Aran ei dar-li mès possibilitats e qu'es empresaris s'impliquen mès, que semble, en un principi, aurie d'èster er objectiu d'aguesta Comission. Atau, era Comission a de hèr eth sòn prètzhet perquè ara semble que des d'aciu dejà s'estigue dictaminant e arribant a conclusions dera Comission quan çò unic que se pretenie ère crear ua Comission entà tot açò. Ei vertat que dempús i a un següent punt a on se parle de tres qüestions mès, que s'anaràn abordant e parlant, mès torne a insistir qu'eth personau depén des empreses, e çò que s'a de veir ei coma se consolide era activitat empresariau donques automaticament se consolidarà eth personau.

Pren era paraula eth conselhèr Mgfc. Sr. Manel Rocher González entà manifestar que damb es paraules pronunciades anteriorament pretén mostrar era sua sorpresa donques quan se plantège de crear era Comission non se hè cap de mencion des sindicats, en tot demanar-le eth sindic s'aguesta Comission ei dejà definida.

Respon eth conselhèr Rocher qu'encara non ei definida mès cre qu'era intervencion deth sindic mèrque un perfil e ues linhas de coma a d'èster aguesta Comission, des quaus s'excludís as representants des treballadors quan aguesti son es mès perjudicadi d'aguesta situacion.

Pren era paraula eth sindic entà manifestar qu'aguest punt dera Orde deth dia comportaue que toti i siguessen d'acòrd en crear aguesta Comission, mès s'ara cau definir es agents que l'an de compausar donques se hè, mès cre qu'ara e aciu se son barrejant es dus ambits.

Pren era paraula eth conselhèr Mgfc. Sr. Rufino Martínez Cau entà manifestar qu'era aprobacion pòt èster, efectivament, era aprobacion dera Comission que logicament òc qu'ei cèrt que se s'apròve per part deth Plen era sua constitucion donques coma tota Comission qu'ei creada, en madeish acte der acòrd dera constitucion s'a de díder quines persones o quins elements i son representadi. Ei logic qu'ar igual qu'en quinsevolha Comission s'a de dar proporcionalitat, -en tot supausar qu'era secretària ei d'acòrd en aguest sentit- ei a díder, que juridicament era composicion d'ua Comission non ei eth hèt unic e exclusiu dera sua creacion

senon que tanben i a d'auer un acòrd dera sua composicion entà que coma a dit eth sindic, damb eth quau ei totauments d'acòrd, era part politica sigue minoritària. Per tant, non i a cap de tipe de problèma perquè non ei un organ collegiat qu'age de hèr acòrds, senon prepauses o estudis d'aguest ahèr. Atau, ei d'acòrd en que pera part politica sigue representada per tres membres d'aguest Plen e dus tecnicos deth Conselh Generau; per çò que tanh as representants deth sector s'aurà d'auer en compde era manèra de coma son associadi e coma a dit eth conselhèr Rocher tanben es treballadors i an d'èster representadi.

Finauments, eth conselhèr Martínez manifèste que dilhèu s'aurie de méter un maxim de formacion dera Comission -ues 15 persones- mès qu'en quinsevolh cas ei evident qu'era formacion dera composicion dera Comission non ei sonque préner er acòrd dera Comission senon tanben de poder trasladar, per part deth sindic (deman o deman passat) era carta corresponenta as sindicats, a Baquèira, ath Grèmi d'Ostaleria, eca, en tot díder-les qu'an d'elegir es sòns representant entà poder formar d'aguesta Comission. Pense e cre qu'eth sindic i serà d'acòrd qu'ac cau concretar e que non ei qüestion de discuti'c ara mès cau hè'c.

Pren era paraula eth conselhèr Mgfc. Sr. Manel Rocher González entà manifestar es sues disculpes pes paraules anteriors, en tot demanar qu'eth sindic se prengue aguest ahèr damb interès cossent damb eth sòn cargue e exercici.

Eth sindic respon que dauant aguestes paraules vò auer eth plaser de non contestar ath conselhèr Rocher pr'amor que serie ua respòsta gessuda de ton e, per tant, se la vò estauviar e vò que demore clar que preferís non contestar entà hèr-se un favor a eth madeish.

Un cop efectuades totes es manifestacions anteriores, se prepausa ath Plen deth Conselh aprovar era creacion e composicion d'ua Comission qu'incorpòre as sectors afectadi pera manca de nhèu ena Val d'Aran. Un còp sotmetuda era prepausa a votacion e debat, eth Plen deth Conselh *acòrde per unanimitat* des sòns onze (11) membres presents:

Prumèr.- Constituir ua Comission d'Avaloracion deth Sector Toristic Aranés encargada dera analisi, estudi e avaloracion de tot çò relatiu as problèmas estructuraus qu'a eth modèl toristic aranés, atau coma des sues conclusions e/o solucions.

Dusau.- Nomentar coma membres dera Comission prevista en apartat prumèr as personas qu'ara seguida s'especificuen:

- *President:*
Sr. Carlos Barrera Sánchez, sindic d'Aran o persona en qui delègue.
- *Vocaus:*
eth conselhèr de Torisme deth Conselh Generau d'Aran o conselhèr/a en qui delègue.

- eth portavèu deth grop politic UA o conselhèr en qui delègue.
 - eth portavèu deth grop politic PRAG.
 - eth director der organisme autonòm “Torisme Val d’Aran” o persona en qui delègue.
 - dus representants dera empresa “Baqueira Beret”.
 - dus representants deth Grèmi d’Ostaleria.
 - dus representants deth Grèmi de Comèrç.
 - dus representants des sindicats, un per cada centrau sindicau.
 - expèrt(s) tecnic(s) assessor, en tot depéner deth tèma que se tracte.
- *Secretaria:*
 - u/a funcionari/ària dera corporacion o persona en que delègue.

2au.- INICIAR ERA REDACCION D’UN PLAN ENTARA DIVERSIFICACION DERA AUFÈRTA TORISTICA ARANESA QU’AUDITE ES RECORSI E POTENCIALITATS DETH TERRITÒRI E CONCRÈTE ES MESURES E ACTUACIONS ENTÀ HÈR EFECTIVA ERA DIVERSIFICACION, IMPLICAR EN PROCÈS ES AGENTS TORISTICS CONCERNITS E DEFINIR ES ESTRATÉGIES COMERCIAUS MÈS ADEQUADES.-

Pren era paraula eth conselhèr Mgfc. Sr. Francés Boya Alòs entà manifestar que coma tanpòc se tracte de condicionar era Comission acabada de crear, pense que çò mielhor ei retirar aguest dusau punt dera Orde deth dia e que sigue era Comission era que mèrque er ambit de trabalh, eth plan, era periodicitat des trobades, eca.

Pren era paraula eth sindic entà hèr sonque ua suggeréncia: coma ei evident que per declaracions que i a agut per part des conselhèrs deth govèrn dera Generalitat de Catalunya, cre que serie bon auer ua amassada damb bèth un d’eri entà mèter ath dessús dera taula d’un professionau tot çò que s’a hèt e tot çò en qué se trebalhe, e atau difóner toti es productes de qué dispause era Val d’Aran. D’aguesta manèra, dilhèu se poirà dar un diagnostic des de dehòra qu’assegure qu’i a agut un bon profitament des recorsi o peth contrari, que manque incidir en bèth aspècte que non s’a agut en compde. Pense qu’eth tèma de poder hèr coma ua sòrta d’auditoria de tot çò que s’a hèt en promocion toristica ena Val d’Aran per part d’un expèrt extèrn, dilhèu ajudarie fòrça dempús ara ora d’aplicar es possibles conclusions. Finauments, eth sindic ditz que dilhèu valerie era pena sajar de cercar un ajut o qu’es tecnicos deth Departament de Torisme poderien vier, auer amassades, dispausar de tot eth materiau de promocion e de difusion de qué se dispause e que den era sua opinion

Pren era paraula eth conselhèr Mgfc. Sr. Francés Boya Alòs entà manifestar qu’en aguest sentit -e demane de non polemizar senon d’aportar qüestions positives- quan en sòn moment se plantegèc eth Plan estrategic, que se se vò se pòt cambiar eth nòm e díder-se d’auta manèra, se tractaue d’anar en aguesta direccion e ua des

prepauses que i auie ère sajar d'establir acòrds, mès que damb un tecnic, damb ua Universitat que sigue especializada en tèmes de torisme e que de bèra manèra pogue mercar çò que pòt èster era huelha de rota deth torisme aranés e en definitiva, de tot çò qu'aué s'a parlat e dilhèu se poirà sosméter ara consideracion dera Comission que sigue en aquest cas era Universitat de Girona, perquè ei era que trebalhe mès a hons es tèmes de torisme, en tot signar un Convèni de collaboracion damb era, ara quau causa eth sindic respon que d'acòrd mès que se sajarà qu'eth Convèni lo signe era Generalitat de Catalunya qu'ei qui pòt dar sòs.

Pren era paraula era secretària deth Conselh entà demanar se se vò establir o non un marge de temps entà crear era Comission, en tot respóner eth sindic que çò mès lèu possible, tan bon punt es diferents sectors agen nomentat es sòns representants.

Pren era paraula eth conselhèr Mgfc. Sr. Emili Sanllehy Meya entà demanar, pr'amor que non sap se calerie o non, s'es ajuntaments aurien d'èster en aquesta prepausa.

Eth sindic respon qu'a mesura que s'auance enes conclusions se les poirà avisar entà que i participen, e les poguen analizar e opinar ath respècte, respòsta deth sindic qu'ei compartida pes conselhèrs Mgfc. Sr. Francés Boya Alòs e Mgfc. Sr. Rufino Martínez Cau.

E en non auer mès ahèrs a tractar, se lhèue era session tàs tretze ores e dètz minuts deth dia un de hereuèr de dus mil sèt, dera quau s'estien aguesta acta signada peth sindic e jo, era secretària, que ne dongui fe.

Era secretària

Vist e platz
Eth sindic